

Schlytt / karrhen / stoffbären / rollwagen
Ein schiff möcht die nit all getragen
Die yetz findet jn der narren zal
Ein teil kein für hant überal
Die stießen züher wie die ymmen
Vil vnderstont zü dem schiff schwymmen
Ein yeder der wil vorman syn
Vil narren / doren kumen dryn
Der bildniß ich hab har gemacht
Wer yeman der die gschrifft veracht
Oder villicht die nit künd lesen
Der siecht jm molen wol syn wesen
Vnd fyndet dar jnn / wer er ist
Wem er glich sy / was jm gebrist /
Den narren spiegel ich diß nenn
In dem ein yeder narr sich kenn
Wer yeder sy wurt er bericht
Wer recht in narren spiegel sicht
Wer sich recht spiegelt / der lert wol
Das er nit wiß sich achten sol
Nit vff sich haltten / das nit ist /
San nyeman ist dem nütz gebrist
Oder der worlich sprechen tar
Das er sy wiß / vnd nit ein narr
Dann wer sich für ein narren acht
Der ist bald zü eym wisen gmacht
Aber wer ye wil witzig syn
Der ist fatuus der gfatter myn
Der düt mir ouch dar an gewalt
Wann er dyß büchlin nit behalt

